

Mas proyecto pa enseñanza

ORANJESTAD (AAN) -- Durante e aña escolar 1987-1988 a tuma lugar sin ningun clase di publicidad un proyecto den henter enseñanza basico na Aruba.

E proyecto yama "Discripcion di materia di instruccion" (Leerstofbeschrijving). E proyecto tabata un esfuerzo comun entre departamento di enseñanza y e personal completo di enseñanza basico.

Diaranzon dia 22 di Juni atardi un raport a ser entrega na señor Mito Croes pa pone e Ministro na altura di e progreso di proyecto.

Tabata presente na entrega di e raport director di departamento di enseñanza Richard Harms, funcionario di departamento di enseñanza cu ta encarga cu desaroyo di curiculo sra. Annemarie Halley-Groot y e team di seis persona cu a mancha y guia henter e proyecto cu ta consisti di sra. Nina Schwengle cabesante di school hopi experiencia, sra. Betty Solagnier cabesante di school cu dedicacion, sr. Donato Quant cabesante di school cu a desaroya un metodo special pa siña Hulandes na muchanan di hable Papiamentu, sr. Eric Rincones cabesante di school y educacionista y e dos inspectornan di enseñanza basico sr. Franklin Oduber y sr. Frank Williams.

E raport a worde entrega na Ministro Croes dor di e veterano maestro sra. Nina Schwengle.

Contenido di fase di e proyecto

Tur maestro di school basico na Aruba durante e aña escolar 1987-1988 a describi mensualmente locual el a ofrece den dos vak. A inclui solamente 10 vak den e proyecto.

Pa motibonan organisatorio a exclui e vaknan Ingles, Spaño y Obra di Man. A organiza e proyecto di tal forma cu cada vak ta ser describi pa 10 diferente school parti den tur distrito.

Di e forma aki e datonan obtene ta representativo pa henter Aruba. Pues cada maestro/maestra ta describi tur luna locual nan a haci cu dos vak den nan klas. E maestro/maestra ta skirbi tur luna:

1. Ki materia el a ofrece su alumnonan
2. Ku ki meta el a ofrece e materia ey
3. Den ki forma didactico el a ofrece e materia
4. Ki medionan, material el a usa pa splica e materia
5. Con el a evalua si su alumnonan a capta/compronde e materia cu el a ofrece.

Cu e proyecto aki ta haya un bista cla di kico ta tuma lugar den enseñanza basico na Aruba. Un enorme cantidad di informacion ta bira obtenible pa usa como punto di salida pa

cualkier cambio/mehoracion cu lo mester bin.

Punto importante ta tambe cu delaster un maestro/maestra di school basico ta involvi den suministro di e informacionnan.

Esaki ariba su mes tin un bator inmenso y por ta un fuente di inspiracion, motivacion y conscientisacion pa cada maestro/maestra.

Aparte di cu tur maestro a yuda cu registracion di datos, un grupo di mas of menos 80 maestro/maestra a base voluntario den nan ora liber ta procesando e informacion cu a drenta.

A keda dicidi cu lo procesa e datos den dos periodo. E formularianan cu informacion di e prome seis lunanan di e aña escolar 1987-1988 a ser procesa na October y November 1988.

Na fin di December 1988 e prome fase di e proyecto lo ta completamente cla. For di April 1988 e team cu ta mancha y guia e proyecto a haya ayudo di sra. Annemarie Halley-Groot, hoben educacionista y funcionaria encarga cu desaroyo di curiculo na departamento di enseñanza.

Durante entrega di dicho raport Ministro Croes a expresa su satisfaccion cu e trabao haci te awor. E mandatario a elogia e manera keto y decidido cu e team a mancha e proyecto.

Tambe e mandatario tabata tin palabranan di danki pa tur e maestronan di school basico.

Un elogio special a bay pa e mas o menos 80 maestronan cu ta procesando e formularianan. Una bes cu tur informacion a ser procesa ta e intencion pa sra. Halley-Groot encarga su mes cu tur e trabaoan en conexion cu desaroyo di curiculo. Pa por haci esey e lo mester haya un staf di persona na su disposicion.

Un proposicion a ser haci pa por crea e staf menciona. Ministro Croes a priminti di laga studia e factibilidad di e proposicion ariba termino corto.

Meta di e proyecto

Ta conoci cu tin varios problema den enseñanza basico di cual rendimiento abao, materia di instruccion irrelevante, muchanan cu ta cay afo na caminda (dropouts) ta algun.

E maestronan mes no ta satisfecho cu e situacion y tin kiebrot y deseo pa mehoransa.

Pa drecha e situacion Ministro a laga traha varios raport pa restructura enseñanza na Aruba. E raportnan tur ta cla.

Sin embargo pa discuti nan,

despues tuma decision encuanto e recomendacionnan y finalmente implementa e cambionan ta tempo tempo.

Mientras tanto ta bon pa conscientisa tur e maestronan y prepara nan pa cualkier cambio cu lo bin den enseñanza. Pasobra cualkier cambio of inovacion cu bin den enseñanza ta e homber of muher para den e klas lo mester percura pa un implementacion responsabel y bon funcionamiento di enseñanza.

Prome cu haci cualkier cambio of mehoracion, ta bon pa sa ta con e situacion actual ta den schoolnan basico. E proyecto di "Discripcion di materia di instruccion" (Leerstofbeschrijving) ta un di e fasenan den e proceso di inovacion den enseñanza.

E prome fase cu a tuma lugar den e aña escolar cu ta cabando, ta registra kico ta sosode den enseñanza basico na Aruba.

E siguiente fase lo mester fiha, a base di estudio den concreto cu resultado di tur e raportnan cu Ministro a laga traha ariba tereno di enseñanza y e involucrimiento di tur e muchanan concerni, con e enseñanza na school basico na Aruba lo mester ta pa e ta optimal pa e alumno y pa henter e comunidad.